

四庫全書

集部

欽定四庫全書

集部

彭城集卷八

五

詳校官庶吉士

臣馬履泰

檢討

臣

何思鈞覆勘

總校官進士

臣程嘉謨

校對官編修

臣朱紱

謄錄監生

臣鍾拔元

欽定四庫全書

彭城集卷五

宋 劉攽 撰

五言古詩

淮上

旦起風頗涼  
暑薄意彌愜  
長懷波浪高  
咫尺不得涉  
艤舟望連山  
青靄亂雲策  
鷗鳥去杳然  
空迴晨光接  
卧吟新詩句  
閒理舊書帖  
呼兒飼芡芡  
看婦治箱篋  
為非急

時者無事用輕撼淹留既無悶何必歌長缺

次韻蘇子瞻

顧侯磊落人稱是腰腹常不甘封侯相蔡父誇小史功名保唾掌懷寶豈能已鞅掌人所難見之心獨喜鄴中貴史公秦諺推轂里一黃障九州亦自其名美金城上方畧萬里可寸紙頂踵禹墨間掛冠復遺履蘇公相知心乃在湯湯水抑揚磕然笑吾心嘲里耳

次韻孫少述二首

莢苗欲其實種椒欲其繁我本正禮家世人稱二難學  
射庾公斯取友念必端相與今白首交通可以完羨君  
脫塵垢頤已羞素餐聊為鵬鷄飛各自天宇寬一月三  
寄詩一詩千百觀悅若從君遊君知我心歡

為貧始願仕逢辰叨典州樸直守故學遲暮悲舊遊此  
邦詩書林處士原憲儔怪我何所為干騎居上頭君恩  
重泰山未有毫髮酬遠慙遂初賦清節第一流桑榆不  
相遺歡笑脫羈愁

喜王大自固陵歸

日月疾過隙生者猶行客念君於此中復久事遠役歲  
暮山林閉天寒雪霜積歸來道路勤稍見車馬色田事  
未宜緩春冰行解釋相從今其時迨此役車息

畏途

畏途十殺一昧者已知戒奔航失維楫將恐亦同敗凝  
冰難長清甘醴復先壞桔槔獨知道俯仰非有罪

椿下獨坐

凱風長羣物赤日流正陽幽居似罽煩嘉樹亦陰涼偶  
坐方丈間吾非厭華堂愛此真不材保彼千載長仰視  
龍蛇形屈蟠正蒼蒼勿疑翠羽葆何以居我傍吾聞高  
蓋人專寵來百殃我獨安隱幽入鳥不亂行

結廬

結廬東城下適當車馬路開門閱過客擾擾不知數客  
或為我歡客或不我顧歡我我不驚去我我不慕俛仰  
各異懷音容暫逢迕照影清水中默然不相語魂交夕

夢間昔昔已復寤薄厚何從生善惡非有素寄語朝市  
人知余養生趣

後浦望水

春塘見游魚芳草宜白鷺溪流定幾曲花發應深處重  
來畏已迷堅坐不能去

奉和寬叔新橋之什

昔賢常奪高彼聖猶伐樹物情喜崎傾直道每齟齬況  
茲渾渾川翻覆不可據風波一生憂忠信多逢怒陰虹



架層雲雨氣生寒  
返操舟雖云神失勢  
嗟已屢早師漆園  
學一悟南華趣理會  
定無悶神全諒何懼  
吾道乘桴浮斯文以  
筏喻仰止金玉章煥  
然謝煩慮

晚泊長蘆贈南來鄰舫

沿遡同一川風波情  
豈別維舟暫相從銷  
憂自怡悅明發南北  
飛離懷更秦越

苦寒

不敢怨雲霧不敢悲  
雪霜此是上帝令所  
以誅愆陽不敢

見李與桃前日胡為芳不見蚊與鷄往日胡為翔反時  
固為妖微倖真不祥但令冷氣除豈敢虞凍僵吾道不  
終窮君看松與篁

賞心亭

原注時馮當世置酒會呂翰林張  
舍人章學士皆在坐因以詩贈馮

高堂面虛無水色照羣有不知歸流永但見來帆久蒼  
翠前後山起伏龍蛇走荒蕪六朝舊獨此存不朽涼風  
西北至蕭颯驚戶牖秋意倏已高玄蟬鳴衰柳主人厚  
賓客嘉贈隨所取爽豁破縈紆高涼謝塵垢開筵窮日

影玉斗湛清酒長歌激梁塵爛醉頗無負羈遊屢飄蕩  
攀援每遲後數公傾蓋歡夙昔故未偶夜闌天正黑出  
戶攬星斗明發復殊方行行但回首

汴渠挂帆

翩翩河中舟一一西上水被船力有餘我船力無幾力  
薄日一舍力壯日百里遲速詎幾何推分故爾耳今晨  
東南風帆席頻輕駛舳艫密相銜前後畧相似如將平  
不平頗復令人喜因之念時事冥冥付天理

寄韓持國

帝都冠蓋區百吏鮮閒暇學省獨優游儒冠足休假臘  
前辱飛書雨後果迂駕遠道靡告勞心期莫子詐三年  
坐窮山物色多可訝鶴林失昭師演門吊兩謝素交悵  
傾蓋陳迹空怛化孤吟不逢人默坐常逢夜朱丹親簿  
領蟲早視禾稼全人猶蠶蠶薄賦兼倖喙君來慰何多  
高論聽雖乍雄風快披襟佳境逾啖蔗從容外形骸約  
畧陳酒肉尋芳問名園臨溪陟果榭數稱滢陽叟謂實

龐公亞昔聞固已多今得逾可詫龍門走清洛伊水共  
東下舊都富形勢時卉芬蘭麝雲峯會深入芳草正可  
藉乘興寧有窮歸馬何當跨小官畏繩墨跼蹐甚羶靴  
苟無咫尺書限此十數舍舉頭怨鴻鵠羽翼不我借終  
更行有期屈指計秋夏

寄王深甫兄弟

曹子三敗辱卞和再別悲自古鮮其然今子何似之歷  
塊悞一蹶千里差毫釐白璧固有瑕黃金豈無疵識君

卷五  
問十年每歎時爾遺天命茲可信古學滋可疑上書欲  
薦君身賤不得為寄君北門詩相望空所思

寄王子直

三見登賢書每有千人進少年盛名聲高士離幽遁吾  
憐王子秀屢黜曾不近棲遲困家食屈首仕州郡始疑  
造物意實于才者客寧與朝廷分不使山野盡間令特  
達士竭力事推引知音與彙征千歲名雙振憶君盛文  
華遇事尤精敏雷電騰火車波濤駕蛟蜃譬之逢羿射

所發無不準固窮當益堅達生尚無悶府公樞軸老治  
道常坐論屢聞下榻迎豈惟虛己問人生貴意氣感激  
多發憤想見吐胸中江河出方寸便當薦書上累鰲推  
孤隼咫尺青冥天勵翼見翔奮年華不吾與二老倏生  
鬢祿仕久益貧拙謀老仍鈍于時尚有達得名諒無分  
行當鴻鵠舉判與麋鹿渾江魚事鉤罩吳稻收困囹圄  
時據亨衢寄聲勿招隱

決意千里遊極當何日歸終朝仍閉闔室迺人竟違北

風吹長空弱羽相分飛我呼君應聞何意音問希介者  
當鮮合俗士所見非會知相憶深不為輕與肥

寄王深甫

昔居沈邱門相過不盈里蓬蒿啟三徑杖履適彼此去  
潁已數年居常夢湖水陋巷君所安所居未宜徙憶昨  
春風時君手種桃李二年當著花今秋應結子同生記  
五人次卿今祿仕餘人皆反冠誰最飽書史媚媚懷中  
兒長女久生齒既既乳下秀相繼今有幾固陵好田園



往歲未疆理苗畝無廢功計程萬億秭曩時豫君謀家  
事最綱紀欲令囊有錢更使困餘米伏臘足自了衣食  
常好美自茲謝俗徒閉門唯隱几豈論陶朱公未慕子  
貢氏有志懼難合到今可誰比將無尚瓢簞幸不乏甘  
旨南風素輕浮衆口巧排詆往聞里中免責望多苛禮  
君從段干迫詎免叔孫毀又聞澤宮射吾子時見罷有  
言厭塵勞自誓不再起窮通非異門出處皆一體達生  
知順天偏智乃私己怪君未坦然尚爾交憂喜昨來赦

書下拔滯先賢士寧令有道卷近自吾人始丈夫龍蛇  
變蓋棺事乃已探穴必得虎叱梟會勝堆何能守一方  
寂寥事行常吾為諸侯客正得戎曼鄙簿書每陳前弦  
誦不到耳時方尚鴻鵠自愧雜螻螻匠石悲運斤郢人  
怨流徵非君美無度孰與裁狂斐思身若煩醒洪忍不  
可洗彎弓輒墮鴈投竿常獲鯉寄書非無緣勿愛繒與  
紙

寄王子直

王孫意氣壯文武兩自適著書輕古人時論有馬癖塵埃間何潤陋巷稀軌迹西郊秋欲分風露朝暮積豈惟弓矢勁況乃鷹隼擊何當共馳騁一見萬夫敵

寄原甫

雞鳴行問津日昃未得休高山有懸車深水時汎舟二般避風雨太華行清秋旅遊月魄毀始覺岐路修緬然望西南落日荒維陬應知念行役天中時倚樓

寄王掾

壯齒行九州智當任百憂常慕馬將軍又憐定遠侯汨  
汨州郡役奔走無停留朝與簿書期暮從農夫遊盡力  
蒿艾間令人愧前籌會計與牛羊古來悲孔邱王卿與  
我同歲晏方田疇烏攫道傍肉貂餘身上裘西風木葉  
零清雨天地秋歸來共尊酒歡言役車休

寄王深甫

昔有揚子雲著書恬勢利家貧官不達賓客罕肯至時  
復好書者相從問經義千載故寥寥吾人一何似天涼

風雨餘草樹有秋意蟬吟燕辭歸窮士易失志陋巷可  
相期簞瓢固多味

尋王深甫值其不在歸寄此詩

幾日欲出門適此天和柔邦人皆異情我憶從君游僻  
居正窮巷冰水相交流旁舍代應問簷鳥聲啁啾士貧  
難自高柴水勞深謀昂藏塵世間何異川上鷗我能乘  
興來不能興盡留清談無由接竟夕心悠悠

寄王深甫

原注時為  
池州街真主簿

公綽志不欲滕薛非所居黃香脫枳棲仍集東觀書餘  
艮不挹漿鴈年非捕魚孤裘匪負薪鼎鬲寧杜車物生  
各有宜得志皆自如遠方易故常操末繆續初古賢貴  
相知未俗隨毀譽懷君乏羽翰臨風一躊躇

之官汝州舟中作寄都下

淺智憚遠謀弱力量所任進途遠朝廷退迹違山林代  
耕抱微願儻石安素心小官慕既往有道念在今問津  
自南郭治舟遡清潯鼎鼎去鄉悲冷冷遊子吟凌風卷

晴綠喬木庇高陰黃鳥相喧呼嘉魚一浮沈晨昏偶素  
月信宿在青岑所遇多可歡離念頗用侵嵯峨天門高  
浩蕩瀛海深髦士相提衡精義窮幽尋顧余傾蓋交問  
我瑤華音戒車辱祖道贈策悵分襟簡書甫祇畏僻陋  
方滯淫搖懷日三秋寄情望歸禽

早春懷都下

沈滯幕府官三見春華換早聞知命言豈敢竊自歎  
老謝彫刻鉉鈍鏃幸茲省文書聊以騎款段鄉閭

越南北弟姪稍婚冠霽霽西披垣哲兄秉天翰悠悠思  
者懷歷歷念可看仰視歸飛鴻何當為我伴

瓜步

蒼蒼林表山下惟瓜步水憶昔魏皇帝百萬嘗駐此飲  
馬江水渾揚旌朔風起經營竟無成歎咤有遺恥去去  
常畏人閔默垂五紀大江限南北天意固偶爾奈何奸  
雄才割據爭虎視不有神武功疇能混書軌吾聞清流  
戰王業實基始樓船蔽空來天塹才一葦此時東流波



不足投馬筌煌煌軒臺威凜凜向千祀

寄老菴

茲山韞奇勝四野窮眺覽近峯擢矛劍遠巘矗蓮菑雲  
霞發光彩氣候變舒慘禽不能名秀芳多可攬招提  
就丘壑初地首鉞槩精廬爛金碧淨供歡藜糝佛香晝  
繚繚法鼓晨統統林風忽飄搖天樂隨簸撼靈泉初發  
蒙溫液遂盈坎異源判炎涼及物萬塵默西南江路永  
水墨畫色淡漚鳥破青冥帆檣出葭茨吾人事探討絕

境更平淡悟真心自知得雋首獨領剪茅地夷爽築基

土強檠長松啟門扃怪石列宏富遂初本逍遙知畧貴

剛敢

原注孫會宗智畧士

頽齡惜鬢髮壯節露肝胆由來抱軒昂

豈復甘黜辭滿異多秩摻祛嗟不寔高風故難繼弱

質因自感頽肩疲負任勿藥羞是瘠願言爾為鄰寧使

我餘憾即今桑榆景光翳將就暝

### 潼關

上有蒼蒼山下有渾渾沅兩崖類築甬中道纔容輶關

門密相望設險非一秋借問前代人屈指羸與劉乃知  
伯王功天險參人謀百二制六國一面當諸侯東慙洛  
陽薄北視朝歌羞時平郡國通官守輕戈矛旅程茲出  
關悵然為淹留

汜水關

四山環若屏土色類堅石青冥積靄間古逕漏天隙虎  
牢一何險飛鳥不可歷狹處乃容車天形正修白山行  
十里盡路與洪河直驚波走狂沙瀕洞踏虛壁寒光著

面目噤瘁避劍戟殷然出地雷下與千仞鬪壯哉造化  
功置此限南北乃知巢居民老死皆異域帝鴻始舟車  
夏禹勤底績輪蹄日相尋隘路遂開坼因緣楚漢交英  
雄因智力殺人何其悲貽患實自昔西風卷零雨昏霧  
白日匿泥途未遽央客子怨行役

春日涼榭寄戴大臨

老去苦無悰春還暫真賞念無俗慮侵得以山林往尋  
幽喜人遠習靜憎禽響東風日暄和觸事全勝尚

晚步寄徐從道

日夕興頗適逍遙步城隅連峯蒼翠間決溝見平湖  
鳥去一何逸白雲與之俱太虛自無礙真意寧有拘  
春華白靄靄欣欣動羣枯園畦亦成趣嫩柳榮寒蔬  
思君昨相語水木西山居況此天氣新田野多歡娛  
注想已自爾念歸定何如

秋園

夕陽下西山反照林杪赤初驚秋事早遠見霜葉色  
山

林得吾心消散理輕策翠香襲晚秀柔紫拾新坼涼蟬  
時一聲棲鳥相歛翼還歸卧南簷初月照虛碧

寄王固子堅時在固陵治田

蘇秦六國相晚被讒慝名使有東郊田安得留此聲古  
今事可知達人盡躬耕多君家事治竭力從老農白水  
負郭田百頃畝一鍾耕亦勿鹵莽耘亦無滅裂秋成霜  
滿畦玉粒勝白雪我懷沮溺心早晚從君游且當學林  
類行歌復披裘

陸瑁養魚池

何茲水鄉士尚復穿池居寧知湖上龍不是淵中魚漪  
瀾杳無際綠淨望有餘寂寞垂竿叟嘯歌方歲除

自舒城南至九井並舒河行水竹甚有佳致馬上  
成五首

升曦上南山千峰雲碧明晨風激寒水瑟瑟環佩聲  
老桑柘空麥熟黃鸝鳴浩然田野興遂爾忘都城

高高嘉樹陰下下修竹林水光搖日影人語亂鳥吟興

適盡佳境有逢皆會心安知道路傍前更登巖岑

一溪分百泉一泉流十家惡竹莽連雲古樹橫帶沙魚  
子戲稻秧鳬雛接荇花信美非故鄉無由寄生涯

溪水轉山曲杳如天際流淺瀨不解衣浮查曰為舟惜  
無同心子此地聊淹留但愛溪上兒蓬頭坐垂鉤

南山近仙居太古餘積雪陰寒五月寒松檜為之折如  
何車馬客塵土倦炎熱揮手謝世人吾將與君絕

自曹還都舟中奉酬子中見寄



結束遡都門歡言瞻上東宿春不成裝徒御殊忽忽傾  
城千萬人髻椎隨老翁攬袂強我留路隘馬不通志微  
術無多舉動非材雄畦隧不知拙雕朽寧謂工尚憐畎  
畝民欲使衣食充吏課才第六名品出下中宣期此邦  
人念我如幽風竟慙不赫赫用底書成功人事非有常  
物變何必終移是趣日新應諧猶不窮恥為堅白辨判  
別僻與衷由是知命來但覺心源空思君天材異汗血  
流驃驄定交既非晚接武崑瀛蓬歲月使人驚冠帶昔

兒童別離過三秋會合今復同新詩思何深清月醒困  
蒙相哀賽無成為客謝諸公

奉酬孫少述

意合非有求道遠義彌敦詩書獲我心將老遂不諼  
顏齡若馳波哀逝稍不存念君稅鼎羈飲水棲衡門正容  
悟失道已矣將何言

還家

久客常念歸還家自深願雖非湖海遊早已時節變果

羸施于宇蠨蛸巧相銜  
塙根思哀蛩危棟辭歸燕  
貧加鄉閭慕病益兒女戀  
棲遲免路旁未厭茅屋賤  
衡門過涼雨秋草盈芳甸  
耕耘倘及時筋力自此勸

雪中檢故書見王深甫書因寄

積雪閱窮巷天寒四岑寂  
常時能來人今茲亦絕迹  
探囊理文書卷軸浩堆積  
歲序往不留其人或成昔  
忽如二三子共此笑言適  
我遊皆可人回也實莫逆  
詩句何軒軒有若風中翼  
使我多聞知令我手不釋  
聞君不作

官作官固無益由來全生士不以時世激請問紫芝翁  
寧知五鼎食開門望四野天地漫無隙老鷹凍不飛何  
由寄消息

送張七和州判官

從仕如博奕百萬繫一擲君看大司馬二十好顏色與  
子昔獻賦共登東堂籍留滯向十年尚為諸侯客我愚  
數亦奇連蹇不自惜念君復何為無乃玄尚白時平棄  
奇節幕府鮮籌畫譬如埒堞間安用鸞鵠翼高秋江湖

深莽莽烟水碧輕舟犯蛟鼉勉于慎行役

三女岡

吳女飛若煙茲地留爾名上有愁雲陰下有蔓草生如  
此衆者何遺恨若未平寧無東平樹靡靡向孤城

澄心寺後閣彈琴

高風動長松蕭瑟清我心亦有琴上絃盡得天外音試  
復向城市餘響終難尋

荀春學省同舍十一人集王彥祖為主入分賦十

韻得河字

意遠智無涯樂少憂常多浮生共茲理達士默謂何歲  
月如奔車冰霜變陽和廢書獨長嘆倚席仍浩歌王子  
家千金世歎誓山河勅厨具豐羞載酒信所過重簾飾  
勁風暖日蘇庭柯左手持蟹螯一醺朱顏醅衰老愧投  
分愛賢心匪他相矜不及門聊欲陳四科

養魚

知此升斗狹鱸鱖非所容安知庖所捐後不成蛟龍為

爾釋囚拘置之清冷中不有網罟憂安見拯濟功掉尾  
一何歡餘因循噉喙孰云我非魚正見所樂同

小雨

十日無油雲一春無奔雷天事不可知號令於此頽疾  
風生梁棟宇宙如沈灰驚霆萬車走激裂山石聞此聲  
昔未有曩意非所猜況聞波濤音洶洶千里來雖無為  
霖實猶得驅黃埃終憂稻梁枯所濟萬興萊蛟龍樂盤  
嬉既往寧復回茫然怨雲漢赤日方徘徊

檢覆邾城旱田示同官及寄河南諸賢

昔歲歉無年今夏仍荐饑罷民去南畝賤價捐東菑籍籍道路間餓者何累累藜藿不充腸茫然旋與倪嗟我祿代耕每食為不怡徒懷仲由志身賤那得施屬城上民訟比牒皆苦詞奉詔實有無百聞謝一窺星言說桑田行與父老期觸熱不敢休重趼寧告疲郊原赤如赭東總無了遺墾藝不可分四旁生蒺藜流行誠代有愚弱豈易欺附上亦有刑殘下罪攸司鄙夫不忍此告吏



咸赦之庶茲咻噢恩足以蘇惛憊大農急經費言利析  
毫釐二吾猶不足一切寧謂宜國僑敏爭承鄭邑用不  
危馮煖焚券書田氏人若歸區區二小邦兩士能若斯  
當官在必行匪石安可移諸公悉吾友此志良弗非當  
令徇路人一聽狂者詩

退朝

慮澹事從簡興發謀豈豫退朝建禮門走馬長楸路陰  
風脫林槁朝日破寒霧簡書亦優游賓友慰遲暮神仙

未嘗學臯壤欣所慕靜境出自然勝遊非浪聚杯觴謀  
須臾者敕訊無慮賞音愧聞弦和歌容執御

引泉詩睦州龍興觀老君院作

上嗣位六載吾宗刺桐川余來拜旌戟詔下之明年是  
時春三月繞郭花蟬聯嵐盤百萬髻上插黃金鈿授以  
道士館置榻于東偏滿院聲碧樹空堂形老仙本性樂  
凝淡及來更慕玄焚香禮真像盥手披靈編新定山角  
角烏龍獨巉然除非淨晴日不見蒼崖連上有擎雲峰

下有噴壑泉泉分數十派落處皆琤潺寒聲入爛醉  
破西牕眠支筇起獨尋猗在牆東邊呼僮具畚鍤立鑿  
莓苔穿濃涼一派墮練帶橫斜牽亂石拋落落寒沍響  
濺濺狂奴七里瀨縮到疎楹前跳光潑半散涌沫飛旋  
圓勢束三峽拄瀉危孤磴懸會聞瑤池溜亦灌朱草田  
鳬伯弄翠蘂鸞雛舞丹烟凌風振桂舵隔霧馳犀船沉  
當玄元家嘗著道德篇上善可比水斯文參五千精靈  
若在此肯惡微波傳不擬爭滴瀝還應會淪漣出門後

飛箭合勢浮青天必有學真子鹿冠秋鶴顏如龍輔余  
志日使疏其源

和原甫鄆州樂郊詩

人事有背向勝遊不長絕聞公樂郊行慷慨矜歲月東  
山翠屏秀盧水寒玉直尚有昔來人借問寧異昔羨渠  
亂幽芳梧竹凝茂陰始知秋意高詎厭徂歲深因宜付  
衆妨一作妙大巧當不為島魚皆自歡賢者能勿違華堂  
庇深沉臯壤極虛曠清池湛明輝寒郊無近響公來會

旌旆公晏盛笳鼓魯酒若醍醐齊謳艷巴楚采芹自胥  
樂食甚懷好音因成池上篇為想思歸吟

劉太尉廟

原注燕人  
劉審文

世亂爭鬪繁廢興不可載磨滅幾何人獨茲有餘愛空  
同氣雄武燕薊風慷慨曾是鞍馬間而為治民最桐鄉  
舊墟好峴首遺碑在歲久梁棟傾地荒松枯大古今猶  
過隙倏仰成百代咨嗟歆歆勤勲業匪永賴

欲雨寄張壁

秋事亦已中江南故炎溽北風三日雨正氣還淒肅身  
老慮深簡官閒睡常足庭陰墮長梧園芳亂新菊借書  
喜未見釀酒欣初熟優游諒卒歲何用恨幽獨

雨中寄子直

繁陰不時解雨氣如深秋朝衣始絺葛暮服乃重裘天  
事亟變易得為有常不如何世上士欲以全自求行身  
繩墨間踳踳空白頭唯君可語此意蒙力且邁邁衡雖  
泥途未至乘扁舟興發騎馬來墊巾故風流

林都官種花

林跡異從告退居乃靡祿勞心不治人寓興此嘉木客  
來啟荆扉側砌紛衆綠名存洛陽品秀出海南族理會  
意必歡誰能傷局促時當載酒過三徑成幽熟

送邵興宗之丹陽

赤日裂石土萬家如烘爐君行何事役似為貧所驅埃  
塵稍去眼雲景日蕭疎扁舟乘長風倏忽徧三吳六年  
羈旅倦一旦誰掃除愼忽忘回首浩蕩江山娛

彭城集卷五



欽定四庫全書

彭城集卷六

宋 劉攽 撰

五言古詩

作假山

幽意難具陳  
靜境可因就  
遠求澗側石  
置彼窻中岫  
前為嵩華高  
側構衡霍秀  
巖崿倏天成  
風煙若神授  
他時看圖畫  
應接頗意究  
氣色形似間  
人人輕宇宙  
嘗聞山

林士既往又不復此語我知之衡茅非所陋

暑行

憩馬道傍舍解衣仍佇立四簷庇陰涼蕭蕭風氣入雖  
云茅茨陋枕簟亦自給已勝鞍馬間筋力苦倦急田野  
歸去來餘年猶可及

赤日成畏途相與逃熱行中宵寢不安兩舍雞初鳴據  
鞍寢夢間墮策忽自驚官身跨官馬倦紕奈有程愧負  
田野翁安穩眠到明

傷胡二

古人雖千歲我見如接迹今人雖比肩我視猶異域乃  
知相知情心識非貌識所以識胡君不得同硯席今朝  
滿衣淚哭君寢門側

傷逝二首

去水不可還逝者日已疎悲憂若沈疴百藥無能除英  
英韶華子天天昔同車今德其芬芬佩玉聯瓊琚舟移  
悼藏壑天祝嗟愁子蕙蘭秀不實徒見荆棘墟含悽撫

衆稚弔影還室廬高天杳茫茫日月空居諸

我昔曾遠遊歲晏不得返又嘗懼而夢百怪紛亂眼迨  
今疑若人虛實未敢辨促駕逝將歸驚呼寤何晚百年  
非淹期愚智俱不滿彭聃與顏殤究竟同是短愁憂浪  
無端哀腸若湯涸

巢父井

訪古慕高遠回首笑流俗千世得巢父蕭然慨遺躅古  
來知生民滿腹所願足何為讓天下牛口信為辱高風

渺不嗣世態日局促至今西山翁恥甘首陽粟愛此盈  
尺泉百尋瑩寒玉遷陵復改邑缺甃常湛綠君懷浮雲  
志塵埃茲可浴君有冰炭憂清冷相為沃長塗接周楚  
軒蓋密相續能令貪夫廉更使賢士勗豈如漢陰叟抱  
甕傷窘束我遊阻勝縣長謠慰心曲

題李白祠

舊聞謫仙人多以我為似三生去來今惟獨變名字泊  
舟姑熟溪風月不如意舉頭望青山酌酒聊一醉漢宮

三十六當時各自貴昭陽與華清究竟誰為愧奴輩不  
自省脫靴更誰避而令棄賢材孤負青雲器

宿蔡口

竟日鑑寒水泊舟復新月浮光鏡上下空寂照毫髮華  
星湧波際人語自天末潛魚躍相聞去鳥飛漸沒明生  
思慮盡清入心源詔洗耳事誠非濯纓情愈闊

立春

歲陰已暗去春色復潛動嘉樹欲芳華歸鴻雜清嘒乾

坤自長久節物厭迎送濁酒歡我愁浩歌為誰縱古人  
盡流水世事皆宵夢白日少借留青春亦公共舉眼向  
高天吾謀不能用

次韻和楊叔恬贈鄭秘丞

緯蕭棄明珠龜手安緝漂浮生每殊塗吹萬亦異竅傳  
劍不成顯談舌無與掉園冠宜誤身儒術真寡要歲時  
不我與壯年更稚少白髮綠鬢多班班已盈照安排慕  
無悶推命獨孤笑趨惡甘就迂遣累稍夷峭嵯峨天門

開事業寄周召登賢如弗及得士故頗料乃知古猶今  
孰有賀隨弔寸善曾不遺有功輒先調驂騑自西極翠  
羽出丹微黃鐘陋已歛文鼎嗤菴篠況聞邱園秀得以  
虛名釣唯憂有道卷莫敢後時誚食苹鹿相呼在鶴雞  
羣叫飯牛歌何哀築巖貌惟肖顧予乃迷方黥劓誰與  
療章甫期適越風帆欲踰嶠敦敦樂瓢簞耿耿甚熒燿  
聊謹龜曳塗猶畏撝入廟同聲邈難期僻陋常耳剝逢  
君獨欣然風昔共明詔屢聞諸侯辟復見尚書召奈何



竟棲棲塵土翳光曜西山悲采薇鼎食歸洒削飛將不  
得封重侯付嫖姚新篇一何工大巧全衆妙上言道路  
勤山海窮聽眺次述疇昔遊弁髦追冠醜下云厭屢空  
藜藿甘咀嚼英賢困奇蹇為善誰復劭譬如飲洪鍾偉  
量乃能醕鄭公亦全材大厦方竄窳珉瑤謝尺璧絲管  
讓清獻同當鵠翻雲肯為魚在罾千里由咫尺西城始  
春燒吾聞天祐賢柞械民所燎胡為沮溺傳躬耕老蓬  
蘴

寄劉道原秘丞

卷六

君家廬山南雲水當戶庭丈人懸安車鯢齒頭髮青吏  
隱粟三釜繙書十二經胡然辭羈旅大江急揚舲太史  
司馬公老成兼典刑周南歎留滯武庫森長扃叩關起  
九州授簡歡真詒自茲訪都邑乘興及郊坰清洛湛寒  
玉嵩高環翠屏宮觀想舊蹟叢祠記遺銘俗物不挂眼  
俚言誰載聽畢事黃鵠舉翩然問長亭念昔始相從予  
少予壯齡定交自傾蓋結好深鵲鴒放懷脫羈鼻高論

窮杳冥縱博恣叱梟極飲常虛鉗後會十五年見子雲  
龍廷官書職讎校舊簡同編斲瓠落無所容柘彈緣蜻  
蜓河梁一分手南北如漂萍歲月不肯留瞬息無暫停  
跳丸指飛鳥急雪看凋糞壯懷益漫漫衰鬢成星星勞  
生百年間所恃七尺形從衰得老病詎足稱最靈而君  
復何為疲茶非康寧目視亂白黑奇瘡出潛丁飲腸日  
以狹永夜甘獨醒南方多奇藥芝朮餘芳馨引年亦多  
術何必非穢苓往昔志讀書苦心過聚螢期以怪幻聞

豈祇辨文聽班白乃自悟有為皆濁腥古來豪傑士蒲  
廬祝螟蛉埋骨蒿艾間鬼火猶青熒孰知出宇宙浩蕩  
浮滄溟翳昏照白日幽蟄驚迅霆道心不可傳法語容  
親聆懷君意無涯永望幾涕零寄書南飛鴻矯矯雙翅  
翎

送楊秘丞

結髮仕明世四十列朝籍漢庭殊多賢向子每歎息羈  
旅間何闊相逢頭已白車馬故匆匆復為北州客蕭條

大河渚疲瘵空城域思得愛人長而君著吏迹去思常  
藹然所居不赫赫推此化百里坐當致繁殖常服乎路  
言有志千乘國饑饉師旅餘可使義且力由來騁騏驎  
歷險始盡識尚恨此中小頗復拘繩墨太平進取難子  
雲嘗執戟金張許史間無所用奇策不如課農桑絃歌  
樹風績無由之武城贈詩慰相憶

題孫昌齡歸來亭

丈人髮如漆筋力不知老七十置官歸時人以為早多

公逍遙志所向豁懷抱雖云容膝安不減專城好忘機  
睨雲水寓興植芳草世故不經聽塵軌從却掃壯子官  
瀛洲濟美擅詞藻親歡適為主家事意承考古云陶淵  
明避俗非達道息交以絕遊自處何枯槁公為鄉先生  
里邑每傾倒一言可鎮浮不啻千金寶宦遊失門戶為  
寒悲棧卑祝身得如公每食心再禱

江南田家

種田江南岸六月纔樹秧借問一何要再為霖雨傷官

家不愛農農貧彌自忙盡力泥水間膚甲皆瘡瘡未知  
秋成期尚足輸太倉不如逐商賈游閒事車航朝廷雖  
多賢正許貲為郎

寄題蕭山歲寒堂真已亭

我兄昔高第時論推捷敏由也政事科五人實親近古  
者邦諸侯今之縣令尹試材非不難善政知所蘊投虛  
刃若新利制鐘已泯遂馳能者聲肯作俗士窘高堂久  
頽挫往者嘗隱忍即事新棟梁開軒凌隱嶙後凋拔天

材破的見標準山川濯襟塵藥餌紆客軫嗚呼九州間  
勝事宜有盡向觀松檜姿稍欲死蒿莖始知巖穴士自  
古須汲引願賦嘉樹詩為公廣招隱

與亭

構亭彼為誰高士自相與與遊皆可人與言是真語與  
醉不獨醒與歌從和汝與忘形骸迹與偕同出處實與  
不待求久與非強許世塗異冰炭咫尺或齟齬開此與  
者風寧當轉棄予



次韻穆父送仲至使北

結束大使車張旌理輶策八荒已信浮萬里無直責由  
來昆弟歡庸非一日積冠帶引弓民長城限疆場邊人  
安畫眠老不逢鬪格將帥剽甲兵褒衣垂鞞縱金繒出  
王府百萬載書籍候館如魚鱗相望交國客外門名家  
駒長大儼且碩誦詩三百篇豈減崔亭伯斯焉思無邪  
羣書矧探蹟指掌幽冀州左右皆阡陌皇華一何速區  
脫為我役前驅弩在欄郊候抹紅額天聲暢無外不必

關塞斥但看書同文依然具點畫夷羞珍漣醕胡舞喧  
匏革獵圍得孤兔割鮮亦奚擇儒生自古貴忠信行蠻  
貉雖令博望侯何敢輕逢掖

西都大內作

太紫異垂象河洛殊出符卜食綿往祀宅中雄別都旋  
宮千萬門層城十二衢佳麗帝王州爽塏神明區過位  
思自飭簷闕在必趨瑠璃映瓦翼瑤琅耀金鋪白日互  
蔽虧涼風倏來蘇仰視制作雄疑有神物扶始知壯麗

功不使來世踰擇材自千章街巧非一圖儻無日新美  
何以除規摹西賓尚餘諭望幸猶踟躕何當樹翠華萬  
玉趨赤塗

慈孝寺送顧待制次韻和孔舍人

丈夫老益壯鬢毛豈知秋多君志慷慨不避千里遊躍  
馬過黃河北視三四州要官在東序河圖間天球古來  
功名人未就不肯休譬如鑿空使尚致安石榴況今南  
畝民往往東西流還定安輯之千倉仍萬斛

新作西池呈王守

清源注長波縈回十里內泓澄鑒羣物雜細分毛介旱  
歲未嘗減隆冬方可愛傳云五龍舊疑有神物在惜此  
去人近久隨荆棘廢賞心一朝同版築四面會鑿池兩  
漢集抗榭羣山對種花漸成蹊栽竹俄自倍荷芰入四  
鄰鷗鳥盈千輩魚遊明鏡中人語紅塵外眷茲仁智樂  
況乃登臨最滄浪歡濯纓藥餌勸飛蓋訟閒固材勝神  
逸自形泰願言載筆間屢得從公邁

泛舟

出郭已清思，浮舟暫長嘯。  
水雲兩涵泳，青翠相照耀。  
賞心隨值遇，物色相顧召。  
逍遙忘迴期，頃刻攬衆妙。  
白鷗亦知機，潛魚不可釣。  
飛沉信樂然，迴首寄一笑。

和黃節推陪王守泛舟

清池堪百畝，珍木多十圍。  
灌泉昔未盈，移樹今更肥。  
境豁自心匠，宴游及韶輝。  
居然坐高齋，不減臨郊扉。  
青旗貫凍酒，春服成單衣。  
游人半童叟，好鳥偕鳴飛。  
彤襜照

銀章寶從相因依置觴面高軒密坐羅芳菲清笳急鳴  
鼓紅粧耀遲暉澄潭止可鑑畫楫相與揮曳裾載筆簡  
自顧才也微之子傾蓋賢賞心諒云稀長歌善必廣舊  
令繁勿違徒令夕陽暝不醉終無歸

舟行

川形直如線川水疾如箭扁舟急鳴榔頃刻異州縣晤  
語不及聞注視目已眩川后扈予橈黃鵠莫我先客行  
自起越快意令人羨寄語幽并兒勿誇鞍馬便

題卞大夫西湖所居

獻玉晚見售刺虎有餘勇宦游四十年老髮成種種乘  
軒非不榮半刻未為冗而有田園歸來路益光寵平湖  
澹空闊古木俱秀聳樵斧間漁舟稻畦連麥隴田舍易  
所求達生厚自奉晏眠勝飲冰一笑異將恐予亦淩落  
人不知物外重賣書問東家此計行接踵

重用前韻贈卞大夫

辭滿苦不早獨往始為勇聞君湖上田二頃容五種力

卷六  
農有休期雜費寧謂冗歲事副夙心素封彌假寵若人  
壽者相眉豪耳秀聳陶公請息交林類歌面隴諸侯非  
得友明詔期不奉叢茂鳥所安淵深魚勿恐由來浮雲  
志九鼎未加重胡為突不黔憔悴摩頂踵

江行

移舟次北渚風水亦有說隱几見羣山昂頭看新月田  
舍煙微茫江舫火明滅夕陽歸鳥盡入夜人語絕勞生  
間憂虞各自有怡悅趣取一時歡誰能問蠻越



題劉羲叟著作澤州園亭

王屋連太行重關東其左自古悲推輪多君識高卧鑿  
泉深百尺養竹成萬个詩書滿高屋談笑驚四座人常  
求贏餘世每敝名貨看君逍遙風陶阮不遠過

次韻

落泉無時休洩雲常自還居然萬峯秀共此亭戶間  
華力何壯鑿隴巧已艱造幽非近規會心寧愧顏朝  
扉面蒼蒼夜枕聽潺潺時以松桂聚葱翠皆可攀長歌發

真賞錦繡先爛斑  
座客齊起予清玉  
聯袂環夙齡慕遠  
遊未能遍人寰  
學仙理茫昧遁俗  
事間關風波天一  
隅不到三神山終  
當振衣往對境聊  
自閒

賀吳九

儒術喜迂濶學官  
每留滯君侯誠百  
一才智兩自異新  
書三十章慷慨天  
下事每聞一篇奏  
左右稱萬歲峨峨  
蓬萊山冊府上帝  
祕紉書必英才念  
子方歷試前此三  
數公致身自容易  
心知青雲路已識  
翰飛地豈獨鈇槩

間是正瓊瑤字顧念傾蓋交寂寞彈冠意

盆池

覆杯切堂上兒戲種蓮芰自憐守甌石及物功已細蟲  
魚共涵泳蘋萍生自恣清澄照毛髮列宿鎮三四炎風  
久無雨淮海日騰沸豈不潛蛟龍莫肯救憔悴惜哉萬  
里波貽此升斗愧人當問能否何必嫌小器

贈黃安期推官

案放本傳從知兗毫二州吳居厚  
代為轉運使奉行法令致財賦乃

追坐放廢弛黜監衡州鹽倉詩內  
言我來衡山陽當即監鹽倉時也

退之謫陽山始得區生喜其後遷揭陽頗復稱趙子窮  
荒非人境瘴海絕涯涘親識久去眼此言不到耳所歡  
誠易為未必盡洵美諭如逃虛空聞人足音爾我來衡  
山陽情況本異此一意等萬殊何嘗分遠邇四海皆兄  
弟蠻貊固州里而於擇友間頗戒不如己乃得黃夫子  
風韻淡如水為學本之性言文貫於理遺我累幅書磊  
落字盈紙不詭亦不矯不華仍不俚胡為連城珍韞藏  
匱與匱賞心一何快區趙非所擬昔我在朝廷嘗得二

三士聲名未振發自任以為恥於今復何能有志而已  
矣譬將助飛遷身方在泥滓作詩寫吾心詞殫意未已  
同韓持國遊五嶽觀時原甫暨諸公先在因寄江  
鄰幾梅聖俞

簡服車馬輕出郭塵埃遠沉茲偶同好慵惰重推挽壽  
宮如屯雲重門謹關鍵五城十二樓瑤池芙蓉苑境深  
日遲永天近春纖婉異花秀的的弱柳垂宛宛初從釣  
天游列帝皆龍袞俗骨已屢驚凌虛翻自忖却逢桃源

客笑語何繾綣尚留樵叟某競勸胡麻飯金醴泛餘杯  
芝英餌豐本平生此遊勝餘恨相知晚重來恐已迷盡  
興仍忘返羣公謫神仙吏隱亦肥遯尚平夙昔志讀易  
明益損寧知五嶽期不待越崖巘何當謝羈束相與同  
息偃

夏夜露坐

林卧霄露清仰觀衆星暉上天垂光彩樓觀何參差閣  
迫絕銀漢華蓋臨紫微凝神雲霓表忽與汗漫期整衣

閨闥門濯足牛女磯酌酒援北斗鼓簫招南箕極意謝  
驚煩塵世良喧卑

雨後

雨後炎氛減空堂起清涼蕭蕭野風聲淡淡孤月光晚  
睡夢亦短常苦秋夜長停燈覽羣書坐以待未央鷄犬  
互爭栖鄰里春黃梁中夜寂無喧蟋蟀鳴我傍

送福州范文學兼寄張宜

山林思長饑君門不易入今時行路難自古志士泣范

生岷峩秀學古名字立流沙萬里駒未恨晚羈繫一命  
吏甌越扁舟去鄉邑文學亦備員海隅更卑濕揚帆下  
三峽南斗安可挹問津頗浩蕩蹈險實蹇澁吾聞養賢  
俊不但糠粃給乃知黃金臺始隗衆士集送行勿惆悵  
人壽期七十古來功名士白髮亦可及因君謝張老青  
紫未易拾且當黃鵠舉不爾玄蛇蟄

送孫巨源

衰老不擇交傾懷未嘗悔非吾相知心亦有中獲罪誰



能若楸柏雪霜不變改自念孤鈕心炯然鎮長在識君  
始恨晚及此將十載相與忘形骸依然見樂愴翔鳳刷  
羽儀天真輝文彩清泉濬長源濫觴已自倍乘間輒相  
過慰我冒傀儡使我意軒昂脫我中心瘳今君官南州  
揚帆盡淮海腰綬盤青綯兒衣間繒絲蘭羞當及時倚  
門方有待一值歸飛鴻寄聲尚無怠

登城望山

城隅見連山蒼翠橫座中白雲卷霄漢千疊張屏風此

全宋詩卷六  
卷六  
地有佳致望望情不窮忽如出塵寰相對前後峯古塙  
有石色草樹仍蒙籠樵隱事不一養病方易容

同謝二兄弟游城南王氏園坐竹中水上

昧旦從吏役中昃既休閒慨然田野興策馬從近關謝  
公雖朝裾雅意存東山相期物外游待我季孟間晴陽  
煦烟郊藹藹春氣還南溪已浮水亂石聲潺潺意得境  
彌好形勞心詎艱名園得暫息奇樹多可攀去水貫林  
竹脩篁夾澄灣波光龍蛇行微風鳴佩環窄徑偶深入

交柯存勿刪並流一長嘯照影清心顏勝事宜有盡向  
此同蒯管發興自我輩忽如遠塵寰嚴城迫歸鞅夕陽  
稍朱殷後游期不忘秀卉春爛斑

潁州始居

伐樹聖不憂奪鬲賢不羞士生志四海外物非預謀乘  
流既孤逝擇廕方暫休俱非田園歸而媿鄉黨投卜室  
遠人境開門面良疇車馬寂不喧水火仍易求主人邦  
之良高義逾九秋傾蓋仍舊交食薇亦願留如何干旄

詩千載令更酬

春葦所居

貧賤智不遠終年謀一身北堂甫成冬西軒已送春開  
窗納清風掃地祛凝塵今是覺昨非會意成日新一悟  
蓬葦興寄言當世人時事亦寒暑無為迷舊津

寄傅推官堯俞

三川帝王宅二周官蓋都上公聲德化多士盛中區是  
年詔有司使獻賢能書傳納事匪易吾與夫子俱率馬

仰駢驥治玉慙璣璫同舟共艱難傾蓋聊歡娛浮雲儼  
高冠白雪紛長裾馳辭若波濤掌握皆明珠詆訶詎敢  
然倚辦實有須從子驂之靳相與步驟趨棘園似南宮  
大暑臨通衢不遺老成人頗多君子儒丞相顧而歎里  
閭共稱譽狂士或妄談衆人皆抑揄至今頗自矜快意  
勝過屠不言世所無請問誰弗如微官苦繩墨離別天  
一隅向風願相從不及單飛鳧雲中多賓鴻河中多鯉  
魚契闊誠未忘寄聲當勿疎

和原甫同諸公飲鴈公園

車馬何籍籍相從城南陌大第鏤名園朱閤間素壁即  
事覽勝際撫舊歎陳迹零落歸山邱慨吒西州客春風  
幾時還顧盼生顏色雜英綴初紅宿莢吐新碧故池無  
還波喬樹實自昔賞心及茲辰緬想締構力十千置尊  
酒玉斗雪霜白飲醉半歡哀浩歌懷感激天地亦旅人  
川谷故變易歡娛瞥過目百年猶暫覲即令西馳暉稍  
復向禺矧我輩不盡興將為後時惜

穎州和永叔

羈鳥能擇木游魚知赴淵飛沈豈異志行止私自憐  
玩世本無術辟人庸得賢卜居幸樂國負郭依良田  
心與地俱遠我徒共熙然生涯亦何有聊以忘吾年

送謝大城南還遊集禧觀寄謝大得箕字

驟雨墮河漢烈風振南箕秋陰變蕭爽重此田野期  
森木蔽嚴籟交流會清池幽鷺起豐草鳴蟬嘒喬枝  
客車忽已遠樽酒難重持誰令語言適笨作別後思  
夕霽歸

馬輕叩戶仙真祠羽人披衣笑宮殿涼參差黃鵠自飛  
來青竹方可騎相從豈無術望君隔前陂

書懷

幼學慕高遠讀書不求解志為逍遙遊恥以聲名賣寧  
從子桑簡不顧伯夷隘未常憂瓠落豈復顧機械邈時  
良無悶涉俗適得性但使心休休那論行央央世塗劇  
坎穽人理甚蜂蟻低顏費將迎非意成睚眦鐵冠喜彈  
畫法吏樂罽洗濯出癰瘕丹青恣描畫抗言畏不傷



奉職謂匪懈指撝本無瑕銷鑠緣鼓鞀羣嬉更嘯呼  
巧逾狡獪抵巇加捷翻取必期稱快上恩初優假一青  
猶縱解雖蒙三面寬未免六翩鍛全生愧液楠有道美  
瘠賸失馬未必悲墮甌何足喟后皇物羣生大塊為之  
噫在盈或時虧有支那可壞行葦無踐履甘棠勿翦拜  
猶將采葑菲詎有棄菅蒯寧當置韶濩始欲薦任棘厭  
飫椒與蘭玩惜饅而餽宿名守枯槁知命遺芥蒂猖狂  
蹈大方屈服嗑若喝腰舟雖云慎吹簫亦已憊既往誠

無追有來當自戒蕭蕭鬢毛改杳杳歲月邁愚謀向千  
失晚悟猶一灑龜手世緝紃支離保鍼解驚渡學操舟  
閉肆從問卦念皆賢者為亟聞古人話有田倚江湖往  
歲成畝漕還歸宜無圖緒業頗未敗采菰仍得魚種榆  
因及薤小屋蔽蓬茅大園輸精稗逢迎具壺漿稱貸償  
私債暑從泉流濯寒有簷日曬何苦事明經區區矜地  
芥

剥棗

棗下人不行四旁生蒺藜秋來見成實  
粲粲青紅垂敲樹落碧瓦澱石投赤磯  
紛紛競口實聊混兒女為樹上已空枝  
樹下亦有蹊人事但如此桃李真自欺

彭城集卷六

欽定四庫全書

彭城集卷七

宋 劉攽 撰

七言古詩

赤甲競渡

古潭蒼蒼照毛髮  
龍藏水心波色活  
風雷如在石壁下  
有時雲雨何倉卒  
今年大旱百昌死  
神物亦恐俱埋沒  
南人厭龍抱珠睡  
駢舟伐鼓探龍窟  
皆言龍驚當上天

欽定四庫全書

彭城集

九河翻雨石湧泉君不見朝來積水上魚鼈死盡龍安眠

酴醾軒雨中

積雪猶殘雨復新正朝日晦只逡巡浮雲未省見白日  
細草何事知青春杖藜苦恨泥污客解衣生憎寒著人  
遷駕來燕勢未可天意靳靳畱芳辰

在郡作

案本傳放曾為京東轉運使又從知兗州  
此詩云今時督府雄漢魏魯國太山四千

石當係此時所作末句云乃不及舞文巧  
詆為詐忠豈受吳居厚之譖將去時作

朱門深沈十二戟高槐蔽庭有佳色今時督府雄漢魏  
魯國太山四千石讀書作文五十年齒牙脫落頭半白  
平生心事竟何許衮衮簿書為報國吾衰不復夢周公  
聞道家邱居在東垂老纔為少司寇殺一正卯那為功  
詩書誤身既可信却憶扛鼎之重瞳宰割山河一何壯  
指麾天地如回風背關懷楚更齷齪沐猴而冠塗遂窮  
區區諸老為城守頭臙曉入旌旗紅魯人之臯乃自昔  
猶復絃歌一畝宮聖賢萬事盡有命世人何用誇材雄

府丞久吏掾史健時雨霑足年穀豐深居閑閣不復出  
曲肱甘寢日正中昔聞汲黯淮陽亦如此乃不及舞文  
巧詆為詐忠

楊之美彈碁局歌

漢皇初厭蹇鞠勞侍臣始作彈碁戲東方諸公盛得名  
魏文以來稱絕技後宮粧奩乃可為客著葛巾尤更奇  
誰令朱墨異貴賤百世紛紛無已時君從何處得此局  
石理溫華瑩寒玉山形四隤澗谷深別將望秦森在目



少年博戲日益新古事不復傳今人若能興此亦先覺  
辟雍老儒悲絕學

過王氏弟兄

出城問窮僻負郭正瀟灑主人著書長閉關嘉樹當門  
宜繫馬下馬上堂還讀書新詩古琴雙起予昏鴉棲雞  
欲飲翼興盡將去猶須臾徒見城中軒冕客不如吾人  
一逢掖安得茅茨同里居子在東阡我南陌

和陸子履魚膠亦名阿膠可以羽箭又宜婦人貼

花鈿

漢家金縢撫絕域遠夷畏威亦懷德南琛北珍不自惜  
譯官賈人多未識此膠出從遼水魚居人釣魚取專車  
秋風時節候可折白羽鋪綴隨呵噓赤車使者來穹廬  
繡輦玉玦通函書黃河之清那可竢美人紅袖應時須  
丈夫辛勤萬里外少婦深閨苦凝待京兆眉幃傳長安  
翠鈿彩飾令人愛鳳凰得髓麟取角將來續弦弦不覺  
更嗟珍物空傳名欲倩張騫問方朔

昭君怨戲贈

武皇聽歌長太息傾城不難難絕色連娟脩嫫果自得  
三十六宮寵無敵君不見孝宣既沒王業衰優游時事  
牽文辭延壽丹青最叵信無鹽侍側捐毛施此時昭君  
去宮掖邊風侵肌雪滿磧穹廬旃牆燒燿蠹琵琶怨思  
胡笳悲猶憐敵情不消歇子孫累世稱關氏傳聞漢宮  
翻可愁紈扇綠衣長信秋燕啄皇孫兩悽惻當時無事  
成深仇覆杯反水難再收深淵瞬息為高邱塵沙蕭條

金  
卷之四  
猛虎塞邊民獨記和親侯

春日

春波淫淫泉脉清捷蓄作擔芳草生女桑柔弱欲動色  
落枝投斧聲敲鏗山前一雨杏花白布穀來往相和鳴  
鞦韆繫樹徑路熟童稚翁嫗歡逢迎田家此樂世豈知  
人生所急食與衣計謀雖拙日有效筋力無餘身得為

幽州圖

鄙夫平居常歎息薊門幽都皆絕域安得猛士守北方

力排敵人復禹績田生手攜朔漠圖丹書萬里之強胡  
掛圖高堂素壁上壯或陰山來生隅長城迢迢屬滄海  
古塞歷歷生黃榆縱橫指顧皆舊物撫事忼慨時驚呼  
太平壯士多虛死念君避胡來萬里九關深沉虎豹惡  
布衣何由說天子卷圖還君意黯然咄嗟世事非余恥

送王仲素寺丞歸瀟山

原注  
景純名

瀟山隱居七十四紺瞳綠髮初謝事腹中靈液變丹砂  
江山幽居連福地彭城為我駐三日明月滿船同一醉

丹青細字口傳訣  
顧我沉迷真棄耳  
來年四十髮蒼蒼  
始欲求方救憔悴  
他年若訪瀟山居  
慎勿逃人改名字

汲潁水

城中鑿井非不深  
苦泉欲飲先煩心  
天生潁水似碧玉  
盛夏一酌逾千金  
野童挈壺不盈斗  
清能照眉甘適口  
未曾一銚過閭里  
猶以空餅累川后

次韻范內翰西圻老人詩

大行宮車千乘強  
翠華晚駕烟蒼蒼  
龍髯墮地長秋草

白雲悠悠飛帝鄉先驅軼出塞門外天宇寥廓初無傍  
淒風疾雨走道路萬靈奔走誰非常漢家德澤徧四海  
戎夷執紼虛邊疆翺飛啄息願效死以彼壤穴皆容光  
詞臣宗功筆力壯感激顧遇思揄揚周宣中興在雲漢  
武皇最著惟宣防道旁老翁話舊事面目黧黑情摧傷  
賜縑如雪身獨得無衣自幸方同裳桑田變海不可測  
慟哭白日悲風長君不見封禪之君皆不死豈以衣冠  
之葬疑軒皇

和蘇子瞻韻為石蒼舒題

長安材豪雄五都五陵意氣誰能除  
作人不入游俠窟  
寓興聊從草隸書  
崩崖壞山出衆寶  
石刻鼎鑄周秦餘  
江東諸家擅逸氣  
宜官鍾蔡幾不如  
騰龍翥鳳動光彩  
淥池滉漾華芙蓉  
石生臨書得微妙  
神凝意會下筆初  
濃纖巧緻若出一  
老庖利刃投空虛  
人間流傳不得辨  
錦囊玉軸爭貯儲  
以茲得名號醉墨  
聊取勝事題精廬  
豈與西山少年輩  
射獵狐兔夸里閭  
杜陵詩仙有祖風



筆灑雲霧揮瓊琚我今才薄厭數語勉力和歌慙起予

傅堯俞草堂歌

漢朝名臣有傅伯諫諍由來犯顏色蘭臺下筆不自休  
羲陽封侯勇無敵石渠昨者承明直虎符今為二千石  
邀我請賦草堂詩草堂欲歸那可得太行之上無高山  
濟水之外無清源聞君築居山水際清高正為君家言  
上有無心之雲出幽谷下有勁節之竹森寒玉四鄰空  
地猶幾許容我東西一茅屋

虎子

秦山十月朔風起寒巖蕭蕭虎攜子  
撫蘇繞山不敢抹赤豹黃羆相向死  
關西少年勇似飛白羽利鏃黃金機  
解胃陷脰心應手功名一決何辭危  
坐皮食肉已自快況復猛毅充提攜  
雄姿英氣實少並不堪籠檻長羈縻  
至今求食每搖尾摧剛遠害誠其宜  
君勿愛澤麋山鹿大如馬牙角雖具  
無能為厄窮隱約豈足諱會見白額  
跳踉時

和李公擇題相國寺壞壁山水歌

蒼山本自千萬丈，怪爾斷落盈尺中。  
枯松挂崖正矯矯，白雲出谷方溶溶。  
憶昨高秋十日雨，百川湧溢騰蛟龍。  
丹青壞劫不可駐，金碧拂地俱成空。  
人間流落萬餘一，掇拾補綴幾無從。  
當時畫手合衆妙，得此誠是第一工。  
松陰行人何草草，禿幘小蓋馬色驄。  
長塗未竟不得息，嘯歌正爾來悲風。  
巨靈擘華疏黃河，夸娥移山開漢東。  
海波芥子互出沒，大雄遊戲神與通。  
我今與君未嘗覺，

指視壁畫將無同新詩飄飄脫俗格得閒會復來從容

空同

汝山不高鮮喬木汝水不深無巨舟荒草連天荆棘壯  
土脉疎緩多廢疇三年力耕食不飽一時不雨人相憂  
負薪代炭集市井耳聾眼瞋垂白頭土風薄陋趨向狹  
一金之子稱良謀百年人物可料數里閭未見興公侯  
君不見廣成昔從空同居倚玕亦云隱商餘千年兩士  
炯若日希世之才安可誣

畫龍

南人謁雨爭圖龍畫師放筆為老雄煙雲滿壁奪畫色  
雷電應手生狂風觀者皆驚牙爪動攫拏意似翻長空  
吾疑奮迅出戶牖何事經時留此中共言葉公初好畫  
當時亦有神龍下天意為霖非爾能世俗慕真聊事假

冬

蜂房割蜜留度年中林置置長擊鮮朔風吹空塞北戶  
求薪明暖初無煙缺籬補疎已乍密敗屋翳茅元自堅

官租事空不復出積雪塞徑長晝眠田家此樂不知老  
兒孫滿前俱壽考世俗榮名多變更不似田翁一生好

蘇子瞻家畫松圖歌

君家圖畫皆所見近得此松尤可羨根蟠平石蹙蛟螭  
幹出青冥起雷電椶枝橫斜復幾尺綠葉茸茸鋪繡綫  
空堂深沈白日寒謾謾似有風吹面此圖翦裂人不知  
塵外分張數流轉能令神物還相從非君苦心誰與辨  
更惜良工名不傳可憐世俗多夸街為君作歌君志之

後千百年無復賤

赤甲祈雨是日獲之

君不見赤甲之淵色如墨中有神物不可測潛雖伏矣  
心念國翕忽變化誰能識五月亢陽裂金石婦女悲號  
望霄澤簫鼓甘香樂靈德須臾晦冥天正黑風雷礧轟  
震穹碧霧雨霽霓掃炎赫生物欣欣動顏色樵童牧豎  
亦歎息千秋萬歲無終極

市朝

市朝老去無希慕枕簟秋來覺靜便何事連宵夢顛倒  
猶應三世業攀緣蟻飽足尸鬼健尚寐翻令愛不眠

貧交行

貧交多相憐富交多相捐貧富尚不保死生安可道人  
能無以聲利為貧交富交皆不欺君不見蕭朱隙末張  
陳死惟有管鮑真相知

古信陵行

薛公藏寶漿毛公藏博徒侯嬴抱關叟朱亥市井徒我



思信陵君下此四丈夫富貴胡為棄貧士能令君存為君死

方仕致仕

在家出家古有此方仕致仕吾自嗤晏眠足當几杖賜散髮每從田野期息交便爾賓客絕省事何說課最為山濤非隱亦非吏仲元不惠仍不夷

北門行

慕道逍遙遊不作枯槁語二年客都城卒歲厭貧屨乃

知北門詩聖人亦有取自於萬事捷若機今日已晤前  
日非五月披裘不取金放歌會採南山芝

衰老

蒼耳嬰末疾浴蘭殊未解臬耳傳愈風及秋始堪采惟  
昔沙塞陰偶從羊負來葡萄安石榴安可同語哉鷄雍  
與稀苓適用即為貴何必黃金盤磊落薦滋味老人學  
道破諸妄猶有塵緣為疾恙安得澡身并澡心使我有  
意煙霞上

次韻孔常父

老翁衰遲為日久自知不是文章手  
紫微燹煌十二星青閣彤庭掖垣右  
誰令孤翼此飛棲正似枯槎犯牛斗  
諸公可親復可望黃鍾渾宏秋水光  
但論四海矧故鄉清詩翻翻鴻鵠翔  
願言與子同升堂

太液池

建章宮中太液池水象星漢波漣漪  
鳧雛鴈子相羣嬉黃鵠來翔金為衣  
主人勿惜稻粱恩主人勿矜羅網繁

暫來可見不可親  
乘風一舉超崑崙

送原甫帥永興

讀書當為王者師  
論兵要作萬人將  
古來志士希兩遂  
白首儒生彼無望  
麒麟一出凡馬空  
豫章蟠根歲逾壯  
金華事業爛然新  
祖西謀謨誰與讓  
旌旗蔽日紅半天  
笳鼓隘塗車萬兩  
中軍令出聽無譁  
秦山渭水皆東向  
荒夷懍威霜雪明  
屬城陽和春日亮  
趙張成事不足論  
方虎遺詩猶可尚  
龍文金鉉待調飪  
璿樞幹中付羣當

西人歡歌公肯留公車雙鹿畫轡上

晚起

黃昏就枕日午眠入春夜短常獨然不嫌時世欲無覺  
每為身謀私自憐夢為嘉魚潛九淵夢為飛鳥翔高天  
喜來寢覺了不辨安知此興非神仙

漁翁

老翁年侵耕作苦官田稅多不敢住身攜兒孫事漁釣  
編竹為家寄江浦朝尋菱芡逗烟水暮鉶魚蝦宿風雨

人生如此亦自由何用車馬稱公侯

和羅著作作漁翁

漁翁結網求魚子得魚滿船心始喜豈知陂池水不深  
但有鯢鮪少魴鯉漁翁結網安得疎漁翁用力常有餘  
心疑他人得厚味滿眼看來池無魚古來任公不如此  
期年得魚雄渚水龍伯國人連六鰲二山漂流不能止  
由來萬事不同調說似漁翁翁必笑

大風

朝風吹沙天宇窄暮風吹沙地載薄視天昏冥畏其壓  
視地震蕩憂其坼一春三月風不息跼天躋地勞筋力  
波濤翻空礚礚怒行路之難行不得安得重雲十日雨  
洗眼去眯分白黑

初調江陰主簿

小來讀書非為名約身不肯遊公卿祗憐狂簡真吾黨  
謾有文章慙老成漢廷好武臣尚少郎官十年不見調  
青衫黃綬亦詔除落拓敢辭流俗笑

送直史館孫兵部知陝府

侍臣數厭承明廬太守何妨太史書  
十里九坂二轍道  
駟馬高蓋朱輪車分陝已信召南貴  
補郡詎比平原疎  
諫垣風彩東觀筆不待上計看回輿

湘中阻風

十月北風不肯回湘中白浪高成堆  
小如飛鷗大奔馬  
一鷁纔去羣復來一旬陰雲色死灰  
剗剗掀簸初全開  
晨陽照空幸澄澈蜚廉暴怒猶喧喧  
繫舟沙渚依曲隈



歲晏永路真悠哉  
棹夫卷縮亦何恨  
時乎寧有材不材

欲雨寄張壁

北山雲起南山雨  
返照却見南山樹  
逆風燕子能疾飛  
隔葉黃鸝猶獨語  
憶君池上波悠悠  
憶君翠竹聲颼颼  
興來冒雨故相視  
薄暮雷電歸何憂

寄楊十七

楊侯論詩銷我憂  
昔歲相逢偕旅游  
梁多長者不虛語  
傾蓋結交子所求  
三年契闊意不展  
歎彼栖栖為數幽

窮愁著書亦自足有策肯說東諸侯  
長安富貴易反掌  
末路功名猶極鉤天公於予豈愛惜  
由來萬事非人謀  
陰風朔雪五湖凍歲窮高卧思同裘

春寒

越羅裁衫春服新  
寒爐委灰無復溫  
天桃著花紅滿檻  
弱柳吹線青映門  
豈知天事有反覆  
假借專物矜餘恩  
平明雪片白似玉  
敗裘死灰仍紛紛  
女桑吐葉蠶欲生  
東郊草綠方趣耕  
玄冥欺人人弗信  
百蟲奮蟄雷已驚

沈陰驅除生可待白日隱隱浮雲外

清明東風零雨頻曉來料峭寒著人人言天事不可測  
欲回暮春成早春花紅柳綠皆自若一氣變化宜有神  
漆園老人惜光景求術却老無聲影忽聞春有再韶時  
亦覺身當還壯境花前一酌心熏然敢道朱顏非少年

戲謝師直買伊陽田

雒陽東周蘇子賢兄弟馳說雄當年一身曾兼六國印  
舉世皆羞二頃田君才十倍鬼谷子暮年已出揣摩篇

公侯將相可自致何竟高蹈伊陽川

陽翟賈人歌

潁川陽翟趙邯鄲大衢如砥車班班重裝富貴名游閒  
輕紉寶玉高若山關西王孫龍虎驅此中奇貨奇可居  
千金入秦藉短策立談須臾分王符華陽松柏成高邱  
壽陵蔓草令人愁沈沈相府士如市山東共事河南侯  
和王平甫韓幹畫馬行

韓幹畫馬出曹霸得名不在陳榻下詔令師榻辭不可

苑中萬馬師在我王侯讀書愛此言由來能事須天然  
看圖作詩寄慷慨錦文織字珠聯聯乘黃驪裏久埋沒  
安西大宛路超忽丹青能令千萬年不比燕人空市骨  
霜蹄踏鐵精權奇耳截筒竹稍垂絲超然挾後三十尺  
一日千里御者誰舐筆和鈇人所同爾今獨成第一工  
神凝意會不可料天駟降精來此中少陵作詩譏畫肉  
惋惜驊騮氣凋縮未知良工嘗苦心空使時人爭賤目  
九臯相馬觀天機神雋不辨黃與驪君知畫手貴自我

金  
卷七  
何若相法非有師拙工俗子紛紛是畏避權豪如畏死  
生棟濕塗多覆屋巧書掣肘真難使吾知公詩正如此  
丈夫特立嗟已矣

次韻蘇子瞻韓幹馬贈李伯時

韓幹畫馬名獨垂永紈數幅橫素絲諸公賦詩邀我和  
我如鈍椎逢利錐區中纔容三萬里正可腰褭一日馳  
朝燕暮吳亦其亞幸得夷路無繁羈此問三馬皆國馬  
瑰資逸態成崛奇有如秋空見霜鶻下晚衆禽俱伏雌

良工苦心為達到天機要眇潛得之區區駕駘浪自負  
豈可醜骨包妍皮李侯洒筆定超詣尚有天驥君未知  
宛王母寡今授首汗血不敢藏貳師

送程少卿

原注江西  
轉運使

使君舡舸如浮宮蕩蕩帆影垂白虹苦無三江五湖水  
安見一日千里風長蛟巨魚遠避去水府泉室深玲瓏  
使君按俗不異此意氣自覺凌虛空滕王閣前流水白  
西山落日銜微紅城頭臺榭眺望極玉壺置酒光融融

勝遊重臨不隔歲塗歌巷祝歡南公作官得此亦是少  
沉復章綬彌尊崇南金折鈎富九鼎荆揚塗泥多歲豐  
會令利術析毫末萬古江流常向東故鄉秀水三百里  
送遠遊子情無窮遙知躡履待高士安得羽翼隨飛鴻

懷信驛亭晚望題其楹

吳檣東風曉來入楚客齊橈暮去急行人西行人東逢  
迎送歸景不同夕日春煙一望中

戲題西湖中魚



重明水深波洗空嘉魚萬族連西東鯢鮪細碎長者惜  
赤鯉成就隨飛龍南風吹雨中宵雷衆鱗不去真常才  
魴魚如玉鱠第一安得大網相隨來

盆山

青泉盈池底白石中有高山高不極連峰絕壑知幾許  
朝霏暝煙無定色山下清波清淺流魚龍浩蕩芥為舟  
今君欲渡何由得縱有神仙君不識

出門無馬行

市兒暮歸錢滿把田翁秋收禾滿野人生勤苦必有獲  
天事豈常遺拙者鄙夫能言知讀書十五著論驚羣儒  
文章不作少壯用白髮垂領皮肉麤作官不如閒日多  
得祿無若饑寒何百年陳人誰比數滿眼貴士難經過  
欲為揣摩心智短欲學造請顏色赧黃金難成丹砂貴  
紫芝將秀白日晚退居長安百不為出門無馬還步歸  
高天報施固有待可得不如翁與兒

次韻子瞻贈橋道人

昔有仙公項曼都去家十年若斯須還歸壯語驚妻孥  
月邊朝拜雖勞軀流霞一杯真味腴世人但怪醫多盧  
不知列仙山澤曜陰陽變化隨指呼日新無窮非故吾  
喬公築居近灘都交遊洞賓齊爾朱又言其師奇丈夫  
璞玉粹美名不沾郎官仕晉更五胡我今老病須人扶  
衰顏白鬢日已渝捐書絕學休守儒去不為少猶雙鳧  
公能濟我良藥無

俠少行戲王子直

長安少年俠自任一生意氣過人甚許身直以豪取名  
快意那知武犯禁寶刀強弓千里馬風馳電射無敵者  
有時獨醉倡樓春一身歌舞兼百人休來著書吐胃臆  
脫落章句嗤邱墳王侯願交不可得貴者雖貴猶埃塵  
君不見漢家雲臺畫良將高冠長劍森相向由來落拓  
塵土中不妨論議巖廊上乃知功名為世賢安知輕欺  
惡少年

王家酒樓

宋此詩自夷門城東門以下  
詞意與前不相屬疑有誤

君不見天漢橋下東流河  
渾渾瀚瀚無停波  
遊人閱水看白日  
駭浪瞥遠紅影蹉  
感歎世事亦如此  
振頓兩足行吟哦  
提錢買酒聊取醉  
道傍高樓正嵯峨  
我白銀角盆大如  
斗  
臞雞煮蟹隨紛羅  
黃花滿把照眼麗  
紅裙女兒前豔歌  
樂酣興極事反覆  
舊歡脫落新愁多  
夷門城東門南對  
屠兒墓信陵今安  
在賓客散如霧竊  
符事可鄙袖椎復  
何慕猶令主人成  
大功千歲英名若  
可遇笑殺平原君  
恥從毛薛遊選士  
十九人毛遂晚見  
收丈夫一

身貴特達因人成事良足羞

和章都官洞庭詩

閨水須閨秋水時洞庭八月為最宜百川湧溢注平曠  
倒卷溟海翻天池瀟湘沅澧紺碧色千里一片清瑠璃  
蜀江亦濁遠不雜正若黃組縈鑑匣長風簸軒一何壯  
雪浪成山相蹙移奔霆擊電恣轟礚素車白馬交橫馳  
朱垠騁望更無地翼軫落影光參差南極老人坐盤石  
赤足蟠鬢濯項頤修鱗巨鬣出萬族窟穴鱸鮓泥蛟螭

身軀長大竟無益機械利器潛相隨但令漁師賈餘勇  
冒突死地常安之巴蛇斷骨不自免此曹么麼何能辭  
秦皇屬車八十一赭衣伐山豪不羈九疑不到二妃泣  
聖賢失勢令人悲憶登洛陽值搖落暮霞新月含風漪  
古今光景共一瞬獨遶四壁觀題詩神官威嚴鬢似戟  
樓船持節森畫旗相靈奔走伺顏色鼓瑟獻巧招馮夷  
新篇秀句遠為寄清風白芷叢余思呼兒疊紙作報語  
衰老撫事情孳孳

新灘行

巴江之水西南來，峽束川壅聲若雷。瞿唐五月不敢下，  
滌灝中流大如馬。風波雖惡石不去，太古以來怨行者。  
君不見前日巴山復摧裂，萬仞泉兀江中絕。孟冬水涸  
石角見，上流下流盡精鐵。當時長年皆有語，後來難危  
從此數。上天設險知為誰，但恐妨人如滌灝。



欽定四庫全書

彭城集卷八

宋 劉攽 撰

七言古詩

和楊十七傷蘓子美

蘓君在朝素機警氣排青雲力扛鼎鵠鴻遇風鄙巢栖  
騏驥得塗喧坎井千金置酒宴長夜錦繡照爛絲篁靜  
明珠盈車謗隨起白巾還家酒未醒翟公署門賓客改

魏牟去闕江湖永濯纓漁父唱滄浪結廬陶令依人境  
時浮扁舟就什一出從數騎非造請窮途詩語尤慨慷  
暮年筆法加豪逞霜凋蘭蕙不待老一世驢悲竟俄頃  
遺書猶缺茂陵求卜宅乍許要離並生平相望不相接  
凜凜氣概吾能省川流既逝安可回駿骨雖買何由騁  
知君金石嘗定交末路人琴俱不幸大招無復修門期  
懷舊邈與山陽等

城東觀魚

東城水深色如黛，居人來過不知愛。我浮扁舟轉城曲，  
蒼烟古樹寒相對。忽如身在松江游，況有漁子前操舟。  
霜天黯黯始下鴈，雪浪杳杳頻驚鷗。萬魚挂網同時急，  
赤鯉長大猶人立。舊疑古潭有神物，倏見金鱗却騰入。  
檝師獻功喜相顧，岸傍驩聲仍至集。主人置酒樂未央，  
艇子行舟輕相及。吳酸縷鱠白玉盤，四座相喻同加餐。  
人生萬事豈有難，我能為公成此歡。興極意移令我歎，  
落日藹藹沈雲端。岸草露白天風寒。

觀魚

清濠環城四十里蒹葭蒼蒼天接水使君褰帷乘大舸  
觀魚今從北闕起開門漁師百舟入大罟密罾雲霧集  
小魚一舉以千數赤鯉強梁猶百十濁醪賞功傾瓦壺  
公言錫爵爭謹呼餘人不及色沮喪數竒天幸相賢愚  
濃雲吹雨寒蕭散置酒移船泊前岸暴殄天物古所矜  
誰道於今為壯觀

送張太保知冀州

原注自羣  
牧副使除

使君使敵前歲中手為單于畫吉凶敵人破膽不敢近  
即日歸報明光宮漢家收師三十六水甘草豐馬數足  
問誰虎臣司苑門極望離宮皆首肯長河東來橫冀州  
雄雄大府森戈矛紅旗照天軍令肅紫髯昂藏居上頭  
將軍威名動殊俗天子今無北顧憂舊傳冀士多良馬  
看北客輸旄裘廟謀將新赤岸澤強鄰猶知博望侯使  
君家聲仍世傳慷慨功名方壯年黃金如斗組丈二富  
貴光華真謂賢

送裴如晦知潤州

柳陰深碧黃鸝語川水平堤鷗鳥舞送君臨流眼暫明  
愛此虛涼少塵土何況連檣一月行吳山楚水相逢迎  
稻花吹雨香不絕蘆葉搖風聲正清北固樓臺似圖畫  
廣陵欲渡聞潮生縹壺盈前京口酒紅旆相隨北府兵  
少年投粟常為樂晚歲甘棠空涕零望君鴻飛不可攀  
白頭方出玉門關獨向天涯共明月猶應夢裏借千山

送章學士知湖州

昔賢為親屈小官使君專城情更歡連山大湖水凝碧  
高蓋駟馬車塗丹綵衣兒戲養顏色箬酒賓宴羅杯盤  
吳興釣碣亦可羨悵望從事空南冠

陳和叔賀蘭溪所居近有信來言水竹事戲贈

北山移文那爾為淮陽招隱殊未歸流泉漲溪可屬渡  
修竹飽雨添舊園鳴禽作巢皆有託白雲抱石初無機  
主人已知戰勝樂溪童未老情底幾

原注小謝詩云方  
同戰勝者去翦北

山  
策

柿紅

柿紅梨紫漫山熟冷雨蕭蕭落喬木東田收穀畝數斛  
築塲欲積高如屋柴車斑斑黃犢健丁男肩頰兒指禿  
烹豬漉酒樂社神急鼓悲茄斷仍續田家此樂何所憂  
閭里至老還相收道傍滯穗如山邱何處老翁寧有求  
寄題岳陽酒務水樓

洞庭蒼蒼水拍天巴陵居人無斗泉天生地勢正如此  
抱壘臂飲真堪憐架樓竅木出百尺剖竹接筒如筆直



驚雷發地山鬼憂白波統雷湘君惜吾侯智與神鬼侔  
古來能事皆悠悠會令太湖變春酒更使騷客忘離憂

關西行

關西居人多閉屋屋底老翁相向哭縣官禁錢錢益輕  
百姓無錢食不足平時斗粟錢百數今者千錢人不顧  
大家蕭條無十金小家流離半遶路憶初鑄錢為強國  
盜賊無端皆得職邇來救弊因寬民盜賊自苦民逾貧  
安得萬物皆為銅陰陽熾炭造化工鑄錢萬萬大似尺

官定足用民家豐

移舟城東

厭聞九衢車馬喧  
汎州初出城東門  
陰虹吐雨水勢怒  
河聲浩浩如雷奔  
棹工謹呼事拳捷  
童稚變色愁驚魂  
濟危經險正當爾  
安得拱默為希言  
雖無清泠可澣滌  
喜見黃濁來原原  
便風催櫓兩快意  
千里萬里何足論

游濟堤傅家園亭

濟水與河俱至海  
陶邱之北川原改  
由來天事不可料

黃濁長存清晦在猶餘平堤十里長逶迤東注如高岡  
水泉味甘土脉膩固知餘潤宜羣芳君家園籩臨濟堤  
荆扉茅屋隨高低當軒古木密如蓋無數雜花行有蹊  
谷虛遙聞樵斧應盡靜便有幽禽啼穿栽卜築事未已  
上為層臺深鑿溪東鄰可買莫惜費醵月課原注平聲種當  
令齊柳綠正如陶令宅桃紅應似晉人迷城中老守厭  
窘束行樂得至城東西此家園亭可屢往薄酒自足充  
提携

和楊彥文嵩山詩

楊侯作邑山水中縣南百里維青嵩官閒身老詩筆健  
樂與邱壑研豪雄是時新涼背炎夏草木秀麗全天功  
重青疊碧百萬狀有如耄老携兒童懸泉落崖瀉萬丈  
震雷發地聲隆隆陰風巖洞忽悽愴寒生六月如凝冬  
祠官祀典有常秩掃除給復何其恭孕靈產異遠不極  
面周負鄭人殊風生雲觸石始膚寸倏忽澍雨成冥濛  
羣山相望不足算禮若小國來朝宗幽人羽客此獨往

深處時與神仙通念君吏職有章綬池鴻籠鶴思長空  
暫留靈境寄心賞仰止萬古希遐蹤梯高逕側目力短  
涉厯庠下非穹崇山中居人亦富逸翠竹寒松名素封  
願言携家事卜築採薇飲水欣長終巖田種芝地高下  
茅屋遡水溪西東君能挂冠共此約何必綺季東園公

送徐君章

每秋送客常羨人今秋送君尤惜別白髮相知無幾何  
明日扁舟成楚越忘形誰復到爾汝末路轉憂欺老拙

西風落葉密如雨信宿長淮見清月紫蟹出鮓加二螯  
白魚掛網色勝雪人生功名何由致適意勿羞徒鋪啜  
何時亦得東南征赤脚吳溪嘲釣碣

送楊康公知安豐縣

楊即作文殊勇為辯如濤波掇刺蛩相逢喜吾故人子  
門風宛存令我悲艾蘭驅車最先入百箭穿楊誰可及  
擢第勝人十改官作官不辭萬家邑勸耕課桑力有餘  
吏事不受崇空虛後生才資助出衆何至苦心城旦書

清泉百里環芍陂楚人千年長不饑叔敖子孫負薪苦  
念為廩吏何可為忽憶雲臺故侯司空公五郡士馬河  
西東功名亦有際會數退讓自是雄雋風誰謂鄙夫老  
昏忘屈指古事猶初終作詩寫此豈有意正若指點山  
水書魚蟲

天馬行

漢家天馬來宛西天子愛之藏貳師甘泉貴人寵第一昆  
弟封侯真謂宜軍書揮羽廟選將一朝百萬皆熊羆大

射虛山亦快意死人亂麻非所悲論功廟堂誰與敵外  
庭皆是麒麟兒白茅金印結紫綬老將流落多瑕疵天  
生富貴實有命寧復憶君貧賤時勢高累愚計慮遠大  
志落落嗟徒為渭橋祖道一語泄身累邊鼓家流離

和梅聖俞食鱠歌

黃河赤鯉非龍材欲化不化煩風雷隨波浮沉偷自得  
網羅失身成暴腮火鬣錦鬣鱗雪霜紅眼照耀珠夜光  
若無鯉鮪與蝦蟇安見品格非尋常主人愛客不計錢



少婦縷繪情可憐蜀薑吳橘正相益炊菰絮羹還懔然  
燕人寸腴不足貴專諸全雋非珍味屬饜默懷一飮報  
欲令主人千萬歲白玉換米桂作薪主人家居長不貧  
賣魚一值任公子厭繪與遍長安人

兗州古檜

兗州宅西有古檜十尋度高百圍大生理成全不增長半  
枯半榮常常在游人相與疑汝年檜不能言聊臆宣百  
番桃李香撲地一輩蒲柳長參天束薪尋斧不旋踵種

子著花還比肩老身寂寞無顏色猶有黃鸝來枝側

早行

東方未明天紫色涼風吹空聲惻惻船人起語鳥奮翼  
蘢葭茫茫江水白石潭轉旋蛟龍窟巖壁冥蒙虎豹迹  
生存古木數十圍老死懸藤百餘尺民生有為俱事役  
豈獨羈人不遑息商歌濁酒聊慰懷君不見仲尼旅人  
常接淅

夜携賈十五過巨源作

鄙夫開年便四十白髮垂頤眼眇澁不甘老態日見侵  
自計多憂諸病集待詔侏儒飽欲死囊空有時都絕粒  
丈夫立氣須激昂豈能中夜牛衣泣朱門貴人那易見  
後生美仕尤難挹敝裘敗屨欲安往蹭蹬通衢還獨立  
賈侯游從久不厭孫君風誼今相入由來大瓢矜落  
尚喜靈珀勤收拾暮通水火並鄰居巷無牛羊時屢及  
汎愛已許金石堅覺我衰遲情汲汲清霜著屋萬瓦明  
白月當空北風急排門上堂童孺謹青燈照書簡編輯

縱談自爾外形骸虛舟不值呼張翕赤桐燒酒傾玉杯  
念君屢空此遙給葡萄紫熟梨甘津寒菹盈盤更啜汁  
酒腸雖狹底能足邂逅歡娛論串習百牢九鼎亦盡空  
金帶玉符誰等級三更還家燈火斷浩氣凝虛榮都邑  
斗杓落北草木死層冰凝水魚龍蟄何時春雷起霖雨  
宿雲溫媚天衢濕

次韻裴庫部二月二日遊傳園

二月二日春意動東風生物來無垠苦憐清濟不如古

却愛小園方及辰  
谷鳥出聲已脫俗  
林花一枝疑占新  
銀壺擔酒馬馱妓  
莫辜乘興寧傷頻

桃源

武陵溪深山合沓  
巖谷掩映秦人家  
仙俗迷塗不可到  
春風流水空桃花  
山中道人多百歲  
翠髮蕭條神骨異  
漁舟往往傍林麓  
相逢亦問人間世

黃金

黃金能成不願鑄  
封侯可得差有求  
小來一意今白首

世事萬變都無謀詩書已廢徒博奕交友益落空沈浮  
江湖漁釣足自給拂衣歸去營扁舟

瑞荷

西濠本連金水河天潢之下分餘波波深水靜生物秀  
十步百步皆圓荷五月浮舟人不見瑞荷亭亭尤可羨  
連二雕成白玉盤合歡裁作青油扇浣紗女子紅蓮房  
背面照鏡勻鮮粧斜陽弄影並高蓋下有戢翼雙鴛鴦  
人情貴少瑞云美亦自天和獨鍾此周王嘉禾獻同穎

漢皇竒木誇連理君不見今年大田所收十萬倉上客  
為子歌吉祥

鑿井

旱天雨少官鑿井鑿深源長水泉冷塗人無復觸熱憂  
居人況有操瓢幸前王扇暍力已勞後王舞雩功不省  
此功一成千萬年却願炎日長當天

次韻和羅著作風琴詩送畢長官

君不見長風瑟瑟起山林大木怒号喧萬竅是為天籟

來無方中有知音全衆妙洛陽琴工誇死桐齊魯諸儒  
頌清廟刻商變羽不得騁擊手高張空改調豈如風琴  
得自然但令雕虎長清嘯鏗鋳關緩連晝夜已斷復續  
誰能料不論九奏金石諧那辨五絃宮徵少世間俚耳  
何足聽幸有楊萼嗑然笑高堂置酒月如霜金盤照筵  
紅爍燒淵明子賤皆有琴兩君巨惜清樽醺

保州亂

緣邊戍兵精絕倫腹飽官粟思食人健兒睚眦殺刺史



可憐百口同埃塵燕雲蒼蒼日色紫帳前血流守尉死  
亂兵相謹肯畏天保州去邊無百里

耳病

風林幾處颼颼葉石礪無時浩浩泉正欲登山驚雨過  
未經烹鼎怪湯煎病身老態何由避耳疾行當耳順年

竹間亭作

溪東雜花亂如谷溪西老樹交篁竹橫槎波水繞一葦  
綠逕出林凡幾曲半旬霖雨泉脉動四岸春風柳芽綠

眼前景物向人好  
心事幽憂傷局促

城南行

八月江湖秋水高  
大堤夜圻聲嘈嘈  
前村農家失幾戶  
近郭扁舟屯百艘  
蛟龍蜿蜒水禽白  
渡頭老翁須雇直  
城南百姓多為魚  
買魚欲烹輒悽惻

鄧聖求往為武昌令  
刻石元次山窪尊及蘓子瞻  
謫官黃州遊武昌  
見前刻後同在翰林  
因有詩示  
余余為次韻和之

側江小屋香酒醅出林繚逕藜花栽溪風暫過響修竹  
嶺雪未盡蕪寒梅往遊武昌值佳境白雲漫漫紫崔嵬  
孫家舊事頗可見樊山香靄臨釣臺赤壁樓船不餘燼  
屬車豹尾空塵埃埋名腐骨彼誰子正見邱墟黃土堆  
三分割據亦徒話今人尚為羞餅罍謝公伏令首佳句  
遊行相與期江隈次山孟寧繼有作窪尊取飲摩蒼苔  
兩公雄才又超拔明珠照人眸暇開騰龍始知爪牙壯  
掣鷹無復毛羽摧腰金佩魚見官秩不似遷客談象雷

金匱要略卷八  
朝廷一入不得出邱壑何事煩公來南人歌聲易慷慨  
公詩感激成歎哀

蔡河漁叟

河水始消春沮洳老翁求魚日來去川流容船網罟繁  
上流下流密如霧跳蝦潛斗不自惜時復鯢鯪聊可識  
吁嗟勞心能幾何信道相看猶羨他

高樓

青樓高高危九衢朱欄畫拱相傾扶佳人當軒玉不如

紅簾翠幕深沉居危絃促柱鳴笙竽哀音感耳心意舒  
浮雲不行飛鳥徐游人駐車馬踟躕嘉肴桂酒白玉壺  
浩唱爛醉何所居樂極哀多盈必虛世故萬變誰能圖  
飛鳶墮鼠殘諸虞里閭豪傑何時無茂陵老儒空歎息  
曲突徙薪纔賜帛

古詩詠歐陽永叔家白兔

飛若白鷺衆不足珍走若白馬近而易馴古來希世絕  
遠始為寶白玉之白無緇磷乃知白兔與玉比道與之

貌天與神瑩然月魄照霜雪紅眼顧眄珠璘瑤山農提  
攜越千里主人得之誇衆賓網羅脫死鷹犬避一以潔  
素能超羣清江愴神龜大野傷麒麟剗腸折足不免患  
智若三穴方全身主人好奇意不倦有來往往蒙金銀  
老翁守株更有待勿使珍物遺今晨

始涼夜坐

八月秋風高涼風動天地漸疑晝短少閒暇況復宵長  
減眠睡空林露下物色清閒堂明燈門不扃四隅寂寞

羣動息我與蟋蟀皆宵征

劉五草蟲扇子

吾宗白團扇畫作草蟲樣天時變炎涼棄置幾惆悵網  
蟲蒼蒼顏色晦畫工筆法依然在剪裁帖綴復生光白  
月團團仍可愛蒼蠅輕巧蝴蝶狂怒螳斨斧誰能當老  
蠶作繭意自了露蟬孤嘒殊清涼其餘百品隨變化天  
機所動俱閒暇座人咨嗟用筆精不知猶是今人畫畫  
工侯生今白頭有時看畫還淚流壯年名聲却自惜老

去心神無處求始知能事須當年盛時一過殊可憐即  
今拙工各自喜豈知此家先日前落筆輒得千萬錢

題歐公廳前兩鶴

明公真愛鶴相鶴選仙骨遂令千金姿為君軒墀物啄  
腥豈復辭雞羣鍛翼欲比鳬驚馴聆音發舞似矜容避  
寒孤警將依人吾聞芝田逸翮不如此世上悠悠誰識  
真

苦熱



南方炎德非尋常六月高下俱探湯羲和未息不可避  
寒門安在徒相望苦憐萬物暘且死反顧一身困在牀  
願呼快雨洗六合徑馭微風周八荒

和永叔春雪

匳筒吹灰變冥朔生氣萌泉天不覺凝陰忽升氣橫厲  
重雲大同勢綿邈通衢漫漫走流沙近甸稍稍堆喬岳  
焚燼姹女姿飛揚匝野神姦誰彫琢刀圭不惜透牆隙  
捷業俄然垂屋角戶斜尺劒未及收窓缺連環如可握

鮮粧宮女喜深印紅手庠童鬪堅搗暝雞誤曉屢唧唧  
飢雀衝人猶啄啄雖憐林篁有摧折却喜隴苗就優渥  
貧廬敗褐憎破牖富屋珍裘轉深幄使君高義仍汎愛  
穎士多文方力學獵師得雉鮮棄薨厨釀薦甘清間濁  
氣隨陽春破凝烈巧奪鈞工畏名貌吾知郢人不復歌  
古聲比今為拙朴

次韻和裴庫部喜雪歌

四時平分氣升降當冬宜藏反宣暢玄冥羸扇失其職

駢弛威權避威仰由來萬事可盡料一夕同雲迷下上  
始疑羣靈久猜阻勿爾覺悟驩相訪周宣商湯號明主  
圭壁垂盡虛白豈如聖神備參兩精意潛發天垂貺  
朔風蕭條嚴莫犯四野皜白光彌望乾施無方意必均  
陰殺夸多力尤壯松篁得意忍枯槁鷹隼乘時戾寬曠  
層樓眺遠復褰簾密室就煖仍施幃舞投牆隙到中堂  
響拂紙疏喧北向樵林無聲自斤斧野渡爭趨急船舫  
富觴屢舉極嚕呼貧屢踐行赧嘲讓誰令小邑盡華屋

不覺南山失青嶂月臨靜夜絕氛埃濤起風江果蕩漾  
豫期晴和當勸耕徑入園林稍挾杖宿醒未解雞三號  
照梁輝煥晨光亮裴侯清通思豪絕郢曲不比巴人唱  
老均茵憑游益歡閒藉杯酒神俱王明年三農飽牟麥  
病民自可逃無狀

地震戲王深父

原注俗云地震龍魚動

員方肇開圻積塊成坤輿漂浮大波不自止幸有萬里  
之鰲魚抃首戴炎州尾直崑崙墟億載不墜陷始知力

有餘揚鬢播四岳鼓鬚搖五湖豈知古今士竟以地震  
書自是世俗聞見拘潢汙蛙黷相隨居我從龍伯借鉤  
餌釣鼇惟子知非誣

戲作賣雪人歌

北風冱寒紅日短火爐燃薪不知暖南山闌干雪塞滿  
連玉疊瓊何足算時移事異不可言眼看星火垂南天  
道傍喝死常比肩市兒相與羸金錢微功有時難以全  
物生豈有金石堅煎湯沸騰在眼前可得意氣長矜權

刀景純得假還丹陽

晨霜落川水行子自相趣帝城桂為薪斗米勝白玉丈  
人乘老猶愛書十年厭直承明廬漢廷三最得予告此  
行亦是思鱸魚沙頭打鼓朝發船揆桡已見江湖天落  
帆京口望北固此溪此山如宛然壯年封侯豈不好金  
朱祗令夸者道聞公東岡長萬杉采芝何似商山老

櫻桃

中庭兩櫻桃枝葉密相對蟠根不十年不能開花如繡

蓋前人費力後人賞曩日春風今日在世間萬事或如此富貴功名豈無待共知韶光過眼疾霞紅雪白不足賴繁華及時數快飲鳥散蜂飛無所悔

上書行

仕不至二千石賈不至五百萬此事夸者憂而非志者歎君不見下邳少年授書起幄中運籌剗千里功成不受二萬戶拂衣歸從赤松子君不見計倪半策誅強吳  
鷗夷扁舟浮五湖三致千金不自擅至今籍籍宗陶朱

大賢富貴不為己心事邈與常人殊逢時致身如反手  
雲蒸龍變無時無君勿愛上書獻賦稱賢豪刺繡倚市  
相矜高丈夫昔曾笑徒勞商賈旦旦爭錐刀

題合肥縣效裕堂詩

并序

江侯既成縣堂以詩及序遺予而請名焉予曰  
夫十人之聚其曲直不可勝聽也數口之家生  
生之具蓋益廣且備矣況以大縣百里占籍數  
萬民之所以望於上吏之所以求于下太多事哉又



况風俗之好訟賦役之無常乎及至乎事修而  
身佚此固能吏之成效也周書曰乃其裕民孟  
子曰綽綽有餘裕吾故名江侯之堂曰效裕言  
侯之才既能以裕民又身獲其餘裕而效於此  
堂也肥之人皆以為知言予因復為七言以報

江侯

九月霜降公堂成江侯寄詩求所名定名揣稱事不易  
以予樸直言必誠百詞號呶片語決十役漫汗一教行

令乎於此有餘裕堂以效實非無形庭羅芳草寒轉碧  
池有魚鳥閒不驚左經右律給嘯咏雨軒風檻含秋聲  
今我不樂歲云暮蟋蟀在堂鴻鴈鳴主人愛客豈有極  
助爾美酒長河傾

傷孫曼叔尚書

金聲擲賦惟興公西河智略稱會宗曳裾置醴初奮發  
聽履題劔方從容上倚壺遂以為相衆恨王駿不得封  
韞吾良臣九京地此意自惜悲重重

茂陵徐生歌

茂陵徐生老且迂一心區區長信書拜章北闕三待報  
意欲霍氏安無虞那知世主心不同積惡未極難為功  
徙薪曲突事不爾壯侯幾人能受封高岸為谷邱淵移  
魯酒之薄邯鄲為人生決已各以時舊意望君君不思

幽谷泉

幼卿初鑿琅琊溪憶當大歷六年時歐陽今疏幽谷泉  
復在慶曆之六年兩公相望幾百載中間游客常比肩


山神愛惜第一境邂逅知者方流傳乃知勝事未有盡  
可憐歲月猶依然穿雲斲苔色澄澈寶鏡霜刃光蛸蜒  
巖前濫觴如可鑒山下積石還成川如公好事誠難得  
推公此心人莫識且如泉源在污泥誰道汲引非人力  
作詩刻石歌泉池欲問何似陽水題

熙州行

自敵請盟供貢職關西二紀剽兵革敵人歲來受金帛  
地雖國本常不惜帝家將軍勇無敵謀如轉圜心匪席

精神動天天不隔鑿空借籌皆碩畫賈生屬國試五餌  
買臣朔方發十策偏師倏然畫西海一月三捷猶餘力  
百蠻解辮慕冠帶五郡掃地開城壁葱嶺陂陀蒲類深  
回笑秦并與禹績尚書論功易等差御史行封自明白  
武功貶爵十萬金徹侯印組丈二尺奮行過望理自爾  
少從進熟來無極憶昔漢武開西城天下騷然苦征役  
哀痛輸臺置肥美割棄造陽損斗僻豈知洮河宜種稻  
此去涼州皆白麥女桑被野水泉井吳兒力耕秦婦織

行子雖為萬里程居人坐盈九年食熙州歡娛軍事息  
天王聖明丞相直



彭城集卷八